

八瓊室金石補正

八瓊室金石補正卷七十

太倉陸增祥撰

男 繼輝校錄

吳興劉承幹覆校

唐 四十二

宮闈令西門珍墓誌

高二尺二寸廣二尺三寸世二行行世二至世七字不等字徑五分正書在咸甯

大唐故朝議郎行宮闈令充威遠軍監軍上柱國賜紫

金魚袋西門大 夫墓誌銘并序

從姪鄉貢進士元佐上

公諱珍京兆雲陽人也曾祖 祖彭並蘊異才不苟榮

祿孝悌雖形於家室聲芳已□□遠迓父進朝議郎行  
內給事賜緋魚袋立性恭寬執心忠亮入侍闈展出撫  
軍師歷事四朝竟無敗累故中外貴不咸遵厥行公  
器局宏邁見解殊倫幹於理劇果於從政志存大略不  
忌小節恒人譏其傲睨高賢許其豁達至德之初釋褐  
從仕大庾之末擢居宣徽建中四年王室多故涇源叛  
卒晝入犯門鑾輿西巡以避封豕艱虞之際尤尙通  
才除內府局丞充鳳翔隴右節度監軍判官時懷光不  
臣潛與泚合翠華於是更幸梁洋節使楚林果有疑  
貳公每於衙府輒肆直言諭其將士徼以禍福國家

靡汙隴之憂州縣免誅夷之弊微公之力殆不及此

德宗聞而異之俾充荊襄沔鄂洪府宣慰使興元

元年遂除洪府判官監先鋒兵馬使伊慎下安黃等州

貞元元年来獻俘賦上旌公功拜內僕令令赴

本道其年季秋改充豪壽觀察監軍判官尋除張建封

尙書爲徐泗節度詔公獨監送上職名如故其年

朝覲遷荆南監軍上以公習於戎事欲將任重

聖心未決久而不遣至八年充劔南三川宣慰

使其六月監淄青行營兵馬三千餘人戍于岐山西扞

荒服上以公臨□不私撫軍有術凡積星歲踰十

瓜時十三年入奏

上嘉其勲錫以朱紱毘戎自從

會盟慙負恩信知我有脩未嘗犯邊

上以閔東甲

士遠從勞役悉令罷鎮却歸本營三軍別公援轡揮泣  
如訣父母豈勝道哉歸闕庭復任高品暨德宗

昇遐

順宗嗣位爰選耆德以輔

儲皇轉爲少陽

院五品永貞元年屬

今上龍飛公以密近翼戴之

績賜紫金魚袋充會仙院使元和元年改充十王宅使

厯事

六朝公智足以周身謀足以解難事上不逼接

下不侮自束髮委質銜

命撫軍宣慈則蒸庶再蘓

討叛則克渠授戮動有流譽人無謗言若非淑慎曷能

臻此公身居祿位志不驕矜克遵象外之談不諱生前  
之事遂於長安縣龍首原西距阿城東建塋域高崗雖  
枕夏屋未封君子聞之僉曰知命 夫人馬氏驥之女  
也內備四德外諧六姻睦允暢於曹風折旋不虧於  
戴禮不幸先公而歿有子四人長曰季常次曰季平季  
華季煜或名叅 密侍或職列禁軍咸蘊構堂之姿俱  
是保家之主以元佐性無飾僞文好直詞爰命紀能庶  
旌實錄其詞曰

洪河孕氣兮嵩岳粹精

聖君當馭兮哲人乃生

才調不羈兮智略縱橫

器宇寢深兮量包滄瀛

結髮從窅兮捐私徇公

弱冠受命兮臨人撫戎

入侍丹陛兮三接明寵

出宣青塞兮九譯潛通

功成位高兮鏘金拖紫

居安慮危兮先人後己

去健羨師老氏之元言

齊死生宗大仙之至理

自昔有生兮孰能不亡

孝彼靈龜兮兆此龍崗

或培或築兮高墳深穴

爰栽爰植兮青松白楊

上以公恪勤事

主密慎左右至七年遷監威遠軍使

晝巡夜警衛士畏威敷奏

闕庭衆稱其美謂保貞吉

以享百齡逝川不留奄隨朝露以元和十二年七月一日  
遭疾終于脩德里之私第春秋七十有四以明年七

月廿日壬寅遷窆於長安縣承平鄉先修之塋從其治命也

是誌卒葬年月另敘于銘詞之後前序及銘係珍作生壙時命從子元佐預爲撰刻銘後三行則葬時補敘也誌中介作丕安作安愆作愆關作關役作役轡作轡岡作岡宦作宦徇作徇

古誌  
石華

右墓志首尾共三十二行正書字徑五分許志言珍京兆雲陽人曾祖名空而不書祖彭父進朝議郎行內給事賜緋魚袋珍至德初釋褐從仕大厯末擢居宣徽後除內府局丞充鳳翔隴右節度監軍判官德



宗俾充荆襄沔鄂洪府宣慰使興元元年除洪府判官監先鋒貞元元年拜內僕令改豪壽觀察監軍判官又遷荆南監軍八年充劍南三川宣慰使又監淄青行營十三年歸闕復任高品順宗嗣位選爲少陽院五品永貞元年賜金魚袋充會仙院使元和元年改充十王宅使七年充威遠軍使元和十二年卒年七十四其云建中四年王室多故涇源叛卒晝入犯門鑾輿西巡以避封豕攷新唐書德宗紀是年十月涇源節度使姚合言反犯京師帝如奉天志文云鳳翔隴右節度監軍判官時懷光不臣潛與泚合翠華

於是更幸梁洋節使楚林果有疑貳公每於衙府輒肆直言諭其將士微以禍福國家靡汙瀧之憂州縣免誅夷之弊微公之力殆不及此德宗聞而異之碑充荆襄沔鄂洪府宣慰使興元元年遂除洪府判官監先鋒攷本紀是時鳳翔節度朱泚亦繼反張鎰代爲節度其後營將李楚琳殺之自稱留後朱泚犯奉天禁軍敗興元元年二月李懷光爲太尉反丁卯帝如梁州三月壬辰次梁州五月李晟等屢敗朱泚復京師六月姚令言朱泚皆伏誅改梁州爲興元府給復二年又給復洋州一年此其事也蓋珍卽爲張鎰

監軍判官正與楚琳同事然張鎰傳言營將李楚琳嘗事朱泚得其心軍司馬齊映等謀曰楚琳必爲亂乃遣屯隴州楚琳知之稽故未行鎰以帝在外心憂惑謂已亟去不爲備楚琳夜率其黨作亂齊映自竄出齊抗託傭皆免鎰縋城走不及遑與二子爲候騎所執楚琳殺之絕無一言及珍又韋臯傳言德宗狩奉天李楚琳殺張鎰劫衆歸朱泚隴州刺史郝通奔降楚琳則楚琳後仍與朱泚爲亂珍有何功而志乃云國家靡汙隴之憂州縣免誅夷之弊微公之力殆不及此毋乃失之諛矣楚琳作楚林志與史異似當

以志爲正洋州本析梁州置境壤相連攷本紀言給  
復洋州一年而韋臯傳亦云帝在梁洋還則當時德  
宗必曾至洋州本紀既云二月丁卯如梁州不當於  
三月壬辰又言次梁州疑梁州之梁乃洋字之譌攷  
藩鎮表開元五年置隴右節度又上元元年置興鳳  
隴西節度建中四年賜號保義節度後吐蕃陷隴右  
貞元初置行秦州以刺史兼隴右經略使以鳳翔節  
度使領隴右支度營田觀察使志作於元和時故有  
鳳翔隴右節度之稱本紀又云建中四年九月舒王  
謨爲荆襄江西沔鄂洪府宣慰使及除洪府判官監

先鋒蓋爲普王時開官也地理志云洪州豫章郡上  
都督府蓋普王之從府於洪州故稱洪府云又云兵  
馬使伊慎下安黃等州貞元元年來獻俘馘攷本紀  
貞元十五年十一月安黃節度使伊慎敗吳少誠於  
鍾山十六年七月伊慎及吳少誠戰於申州敗之而  
其先克復獻俘事遺而未載志又云其年秋改充豪  
壽觀察監軍判官尋除張建封尙書爲徐泗節度詔  
公獨監送上職名如故者攷張建封傳建封爲壽州  
刺史李希烈僭天子位淮南節度陳少游陰附之約  
破壽州以趨江都建封堅壁据之賊不能東遷團練

使帝還自梁少游憂死進御史大夫濠壽廬觀察使  
繕隍治兵希烈使驃帥悍卒來戰建封皆沮衄之賊  
平進封階又任一子正員官貞元四年拜御史大夫  
徐泗濠節度使則珍爲豪壽觀察監軍判官卽爲張  
建封之屬官也前但云濠壽而無廬後但云徐泗而  
無濠濠字又作豪皆與史異攷唐書地理志云濠州  
濠字初作豪元和三年改從濠此志刻於元和十三  
年而猶作豪者蓋西門君於元和元年後既營生壙  
卽屬王元佐撰刻此志及卒後但續刻卒葬之事而  
未及追改豪爲濠也廣韻豪下云州名古鍾離國隋

改爲州又大厯九年顏魯公干祿字書及韓昌黎集  
徐泗濠三州節度掌書記廳石記皆作濠州而通典  
謂隋改楚州曰濠州因濠水爲名唐初因之元和郡  
縣志亦云武德五年杜伏威附改濠州濠字中間誤  
去水元和三年又加水吳曾能改齋漫錄據杜氏之  
言駁洪慶善攷正韓集作濠之誤皆非是惟志又云  
遷荆南監軍未知其詳志又云八年充劍南西川節  
度使本紀貞元五年九月丙午劍南西川節度使韋  
臯敗吐蕃於臺登北谷克嶺州又攷劍南節度於至  
德二載分西川東川是時兩川而志作三川恐三乃

西之誤岐山爲鳳翔府屬縣縣有岐山乃京畿近地  
珍所歷之官以百官志攷之內侍省有六局其一曰  
內府局有令二人丞二人掌中寶藏貨賄給納之數  
及供燈燭湯沐張設凡朝會五品以上及有功將士  
蕃酋辭還皆賜於庭一曰內儀局亦有令丞各二人  
掌中宮車乘皇后出則令居左丞居右夾引又內侍  
省有高品一千六百九十六人品官白身二千九百  
三十一人又宮闈局亦內侍省六局之一有令丞各  
二人掌侍宮闈出入管籥又內給事十人掌承旨勞  
問分判省事凡元日冬至百官賀皇后則出入宣傳



等然則珍係內侍省之宦官而其父之官爲內給事亦係內侍之流矣少陽院會仙院皆不見於百官志而云順宗嗣位爰選耆德以輔儲皇轉爲少陽五品則知其爲東宮之官也十王宅者據長安志云改元先天之後皇子幼則居內東封後以年漸成長乃於安國寺東附苑城同爲大宅分院之名爲十王宅令中官押之於夾城中起居每日家令進膳十王謂慶忠棣鄂榮光儀穎永濟也志言內常侍正五品下內給事從五品下而太子有內方局令二人亦從五品下則此云少陽院五品者蓋東宮官之大者也惟其

初官云提居宣徽考宋時有宣徽南院使此院使掌  
總領內諸司及三班內侍之籍而於唐志未見豈史  
之漏乎節度使有判官一人而所謂監軍宣慰使者  
屢見本紀及列傳亦不載於百官志蓋皆行軍時差  
遣權置之名無定職也據志珍乃於生前建塋域猶  
後人所云生壙也而文銘詞後續題其遷監威遠軍  
使及卒葬年月則此志實作於建域之時并卽於其  
時先爲勒石者故其首行官銜有磨改迹蓋以充威  
遠軍監軍六字添入文後有子四人四係三字磨改  
而其名季華季煜四字亦有磨改迹蓋少子亦係刻

文之後所生故以其名補入耳惟此文題鄉貢進士  
王元佐上並非珍之阿姓而稱從姪爲他刻所未見  
不可解也威遠軍亦不見於藩鎮表俟再攷之此墓  
志前輩皆未見恐係近來出土亦關中之物文云龍  
首原西距阿城東建營城攷長安志秦阿房宮一名  
阿城在長安縣西二十里後又云遷窆於長安縣承  
平鄉先脩之塋長安志無承平鄉其所稱修德里蓋  
卽修德坊也長安志言在朱雀街之第三街卽皇城  
西之第一街第一坊也

古泉山館  
金石文編

按唐中官西門珍誌石嘉慶二十五年出土爲咸甯

帖賈裴修甫所得考誌序建塋紀石皆在生時而記  
卒葬於銘後元佐銘詞不書撰而書上皆創見也西  
門受氏始於春秋元和姓纂鄭大夫居西門因氏焉  
列子有西門子魏文侯時西門豹爲鄴令漢王莽時  
有道士西門思洞仙傳有西門惠按漢書王莽傳道  
士西門君惠無名思者惟唐宦官有西門思恭珍蓋  
其族也唐雲陽縣爲今涇陽消化地括地志雲陽城  
在雍州雲陽縣西八十里元和郡縣志故城在雲陽  
縣西北八十里長安志本漢縣昭帝置屬左馮翊有  
雲陽宮因以爲名唐武德元年析雲陽縣置石門縣

貞觀元年改石門爲雲陽縣改雲陽縣爲池陽縣屬  
雍州省雲陽以其地入池陽而改爲雲陽天授二年  
以雲陽置鼎州領雲陽三原涇陽醴泉四縣大足元  
年州廢縣隸京兆府西南至府一百二十里以今地  
考之當在涇陽淳化境也充十王宅使者唐制自先  
天以來皇子幼居內長居十王宅以中官押之珍釋  
褐於至德初終於元和之末事肅宗代宗德宗順宗  
憲宗凡五主而云厯事六朝者以生於天寶五年當  
元宗之世計珍始入禁近纔十數齡耳朱泚李懷光  
李楚林之叛伊慎之下安黃張建封之鎮徐泗並與

正史合惟楚林唐書作楚琳小異

陸宣公集亦作楚琳

阿城卽

阿房宮故址長安志漢書云阿城秦阿房宮也以其  
牆壁崇廣俗呼爲阿城唐張賁然撰忠武將軍茹義  
忠神道碑葬於長安縣永平鄉阿房殿之墟此誌以  
阿城屬承平鄉承永字近則承平鄉之阿城卽永平  
鄉之阿房殿也今長安縣西二十里王寺厰有村名  
東阿房宮蓋卽其地修德里亦見長安志皇城西第  
一街街西從北第一修德坊本貞元坊武后改

金石續編

攷雍錄云待制有院在宣政殿之東少陽院之西

又云長慶元年於門下省東少陽院築牆及樓觀

又云學士院北廳又北則爲翰林院翰林院又北則爲少陽院是有兩少陽院一在左掖一在右掖西門珍爲少陽院五品當是左掖之少陽院也左掖在日華門之東卽門下省亦名東省日華門之南有太子湯次西爲少陽湯瞿氏指爲東宮之官是已又案長安志唐有宣徽殿此志云擢居宣徽蓋西門珍初入禁中供使役於宣徽殿也威遠軍在榮州和義郡見新唐書地理志古泉山館跋云王元佐非珍之同姓而稱從姪補訪碑錄亦云王元佐署名從姪稱舉不可曉今以石本審之元佐

上並無王字古誌石華及金石續編所載亦皆無  
之不知瞿趙兩家何以有是語也聲芳已下所缺  
石華作著於二字不私上石華作事字石已泐矣  
石華監先鋒之監誤作隨聖心未決之決誤作安  
從其治命缺治字續編涇源之源作原史本作原  
碑實作源拜內僕令令赴本道脫一令字七月廿  
日壬寅脫壬寅二字

冀王府典軍邵才志墓誌

方一尺四寸六分廿六行行廿五字  
字徑四分正書時涉行體在咸甯

唐故元從奉天乞難功臣游擊將軍守異王府右親事



典軍上柱國勒留堂頭高平郡邵公墓誌銘

并序

從姪將仕郎試太常寺奉禮郎飛騎尉仲方撰

文林郎前守渠州司戶參軍魏瓊書

夫生滅之相貫于天地盛衰之門業推而化故期生誠  
榮祿奄歿幽泉机茲褒嚮之靈刻石於元局之記典軍  
諱才志字元甫望出高平萬年縣人也曾諱慶皇不仕  
祖諱儀皇不仕父諱明皇任昭武校尉守恭王府左帳  
內副典軍上柱國賜緋魚袋公卽長男也立身從仕卅  
餘年自建中四年癸亥歲朱泚殺逆陷沒城墀執持堂  
印隨

駕奉天重圍之內苦歷艱危克

復之時功勲崇弊遂遷五品職佐台堦累序勲勞歷更  
九任勤効幹蠹靡資白鼎孝奉家慶之休廉謹風猷之  
德遂至元和十四年八月廿七日藉遇朋友酒筵至夜  
有司糾劾以達

聖聰

詔下書刑貶於坊鎮又遭寒熱伏枕數旬

有嗣子全亮懦直奉孝過於孟孫悲泣跪藥甚於禪伯  
孤妻張氏親看扶舉洗浣哺食不知味寢不求安弟  
曰才應官任清資職司樞密朝入公門暮歸奉孝恭敬  
悲念乳藥哺食在處求盤藥餌無効豈期壽限將畢大  
願不從時年春秋五十有五至元和十四年己亥歲九

九廿七日終於坊州館舍嗣子等號天位血聲一舉芳  
三絕女及諸姪新婦等咸悲慟哭傷痛四隣卜筮有期  
至其年十一月十六日舉葬於長安縣承平鄉史劉村  
附 先代塋之禮也仲方素諳有德乃述其詞銘曰

典軍功效 安國理民 重圍之內 印信奉陳

光榮先祖 忠直事君 孝義奉母 哭竹求辛

身敗四時 久疾瘦羸 醫藥無愈 奄有云亡

魂歸逝水 形影無光 幽局悄悄 歸於北邙

筠風吹竹 悲聲白揚 年年松柏 空嚮泉堂

右翼王府典軍邵才志墓誌補訪碑錄作邵才墓

志尉仲方文脫一志字又以飛騎尉尉字爲仲方之姓又誤冀王府爲冀王事舛錯已甚殆未目見此誌邪首題元從奉天定難功臣者功臣號也冀王府者順宗子絳封冀王也勒留堂頭未詳恭王府者代宗子通封恭王也典軍正五品上副典軍從五品上親事帳內俱同才志以朱泚之亂隨駕奉天事平敘功錫予功臣封號勳上柱國遂遷五品標題稱游擊將軍者當卽此所謂五品也歷更九任文不詳敘但於標題稱冀王府典軍以最後之官書之也文云机茲褒勳之靈句不可解疑有

譌脫幹蠱字蠱偶遇字作藕皆誤

太子洗馬崔載墓誌

方一尺三寸一分廿一行行廿四至廿八字不等字  
徑四分正書直界格篆蓋題崔公墓誌四字四周列  
畫象十二人舊在宛  
平今歸吳縣潘氏

唐故太子洗馬博陵崔府君墓誌銘

并序

承務郎試蜀王府參軍成表歲撰

士有遊藝據德斧藻言行不形喜愠不誤是非者則聞  
之于  
府君焉  
府君諱載字載其先齊太公之後

食菜于崔而因氏焉  
洪源茂根世有名士至于貂蟬映  
時金紫奕代竹帛繁盛不復書矣  
王父謙  
皇易州脩

政府折衝列考季試恒王府司馬府君則司馬之第二子也伯仲五人皆美鬚鬣麗容貌各身長六尺二寸俱懷文武之用爵爲豪盛之家長曰戢隴州汧陽縣尉令弟鉷長武城使兼御史大夫令弟晟文林郎太子通事舍人令弟成大理寺主簿府君植性廉潔執心沖和遷善罔遺見惡必止豈謂德優齡促奄隨尺波享年五十有九以元和十四年五月廿三日遘疾終于幽州薊縣招聖里之私第也夫人彭城劉氏莞莞威容悄悄閨壺齋潔喪事敬逾古昔有子五人男二人女三人長曰公聿試左武衛兵曹參軍侍疾有黃香之譽居喪

繼柴也之哀次曰公淑善諷詩禮名美戎郎昆弟等皆  
善居喪絕漿茹荼泣血羸瘵隣里哀之也女子等皆以  
孩提生知孺慕可哀也哉粵以其年十一月十六日窆  
于幽州幽都縣保大鄉杜村北一里之原附于先塋  
禮也表微嘗接府君之餘論沐府君之清風

學淺詞荒敘事有闕緘之心府有媿幽默銘曰

保大之鄉 柔乾之涓 泉局長夜 潛翳英姿 逝

于中齡 孰不悽其 崔氏之先 仕有英賢 旣盛

簪筆 尔耀貂蟬 太公之封 千古昭然 孀妻茹

荼 令子泣血 隣無相舂 親有鳴噎 志諸貞石

用旌賢哲

按唐太子洗馬崔載終於幽州薊縣招聖里窆於幽都縣保大鄉杜村唐書地理志河北道幽州領縣九  
薊州所治幽都管郭下西界與薊分理

金石續編

唐幽都縣卽今宛平縣列考之列當作烈廣韻齊丁公之子食邑于崔丁公之子太公之孫也有博陵清

河二望載博陵崔也

古誌  
石華

新唐書地理志易州九府有修武而無修政天下  
六百三十四府闕佚甚多每於金石文字見之此  
其一也



寶鞏等殘題名

高一尺七寸五分廣一尺一寸六分存七行行字不  
一字徑七分正書左行在青州城東第二層門側壁  
間

州觀察處置押新羅渤海兩蕃等使金紫

事兼青州刺史御史大夫上柱國韓國

此行  
全缺

部員外郎兼侍御史內供奉賜緋魚袋寶鞏

裏行韋曾

上柱國齊孝宏

儀郎薛華士

裏行源方回

右碑四周皆殘缺祇存諸官姓氏七行寶鞏一行尙全因以爲題案鞏見舊唐書列傳平盧薛平辟爲副使入朝拜侍御史憲宗紀元和十四年三月己丑以義成軍節度使薛平爲青州刺史充平盧軍節度淄青齊登萊等州觀察等使韓昌黎竇牟墓誌載鞏亦進士以御史佐淄青府注孫曰元和十四年三月以薛平爲平盧淄青節度使表鞏自副與舊唐書傳合然則鞏以佐幕至青在元和十四年矣代宗紀大祿十年二月以平盧淄青節度觀察海運押新羅渤海

兩蕃等使德宗紀興元元年淄青節度使承前帶陸  
海運押新羅渤海兩蕃等使宜令李納兼之据此題  
亦有押兩蕃之名當亦以淄青節度兼之則於時爲  
節度使者薛平也前列銜缺名意卽其人與山左金石志  
著作郎韋端元堂誌

方一尺四寸五分二十七行行二十五字字徑四分正書在咸甯

唐故朝散大夫秘書省著作郎致仕京兆韋公元堂誌  
第四子前山南西道節度判官將仕郎試大理司直  
兼殿中侍御史紆謹撰并書

唐元和十四年三月廿三日

公葉背于長安新昌

里私第享壽八十有三嗣子鎮洎系練紆紉哀號于天  
毀未敢死乃誓先王卜地之義以明年五月一日奉遷  
靈座祔于萬年縣洪固鄉畢原 先太夫人大

原王氏之塋焉鎮等咸以 公潛耀道德不求顯著他  
人論議未能盡美盡自志之 公諱端字正禮 五代

祖孝寬後周大司空鄧襄公 高祖津隋戶部尙書

曾祖琬皇成州刺史贈禮部尙書 祖季弼太僕寺主

簿 烈考廉尙書庫部郎中自鄧襄公以盛業洪伐延

耀後嗣以至于 郎中茂繼其德□官壽不至士大夫

到于今嗟稱之 公卽 郎中第二子也體苞元精天

付全德孝友忠信莫匪生知以古之賢筵有保身遺名  
不降其志不辱其身之道莫不洞與心契歸於一揆故  
常以恬曠自適怡攝爲宗是以家人忘貧位不稱德官  
歷率更寺主簿下邳縣主簿下邳陽翟二縣丞國子監  
主簿凡五仕三爲色養二爲孤幼皆非 公之志也自  
是之後蕭然杜門淮夷削平之明年皇帝在宥天下方  
宏 孝理詔百辟父母存有顯擢歿有褒贈時縵爲工  
部郎中由是拜 公朝散大夫秘書省著作郎致仕  
先太夫人追贈臨汾縣太君時謂 公之義方縵之  
顯揚斯爲至矣 太夫人曾祖諱子真 皇襄州

錄事參軍祖怡河南尹東都留守孝毗昭應縣尉

太夫人生令族德門稟柔明淵懿脩睦婦道裁成母訓

輔佐君子踰廿年所以敬養先姑無違尤慈幼惠

下無怨悔續等不孝祿養未及禍罰已鍾而外族淪

替靡所依倚是以霜露怵惕有加岡極之痛焉以貞元

六年奉安宅兆至是蓋耐嗚呼蒼天續工部郎中系陽

翟縣尉練鄉貢進士紆兼殿中侍御史絢前太廟齋

郎紆頑闇不類哀敬不文泣血書石以寘泉隧

右韋端元堂誌首尾共廿七行行廿五字首二行擠

而不勻正書字徑五分許文爲端之子紆撰書其敘

五代祖孝寬後周大司空鄆襄公高祖津隋民部尙  
書曾祖琬皇城州刺史贈禮部尙書祖季弼太僕寺  
主簿考廉尙書庫部郎中端爲廉之弟二子以新唐  
書宰相世系表攷之韋氏鄆公房叔裕字孝寬隋尙  
書令鄆襄公生六子陵州刺史壽光縣男津爲叔裕  
弟五子津弟二子成州刺史琬琬弟六子季弼季弼  
子廉考功員外郎端爲廉之弟二子端生二子縝紆  
表載廉官階皆與志不合自當以志爲正表又誤廉  
爲廉詳案汲古閣本作廉不誤而以尙書庫部郎中爲考功員外  
郎并闕端之官又端有五子止載縝紆而遺系練絢

且據志言縝工部郎中系陽翟縣尉練鄉貢進士紆  
兼殿中侍御史絢前太廟齋郎而表皆無之孝寬周  
書及北史皆有傳傳言韋叔裕字孝寬京兆杜陵人  
少以字行以戰功厯官尚書右僕射拜大司空天和  
五年進爵鄖國公周宣帝崩隋文帝輔政發關中兵  
以孝寬爲元帥東伐關東悉平凱還京師薨年七十  
二贈十二州諸軍事雍州牧諡曰襄有六子總壽霽  
津知名據傳所言則孝寬之爲尚書令鄖襄公皆當  
在後周時與志所言合表屬之隋失其實矣此志不  
稱墓而稱元堂爲自來墓志所未見淳化閣帖唐高



宗敕亦有使至知元堂已成之語想當時稱墓爲元堂猶勝公墓石之言佳城也或因其子所作不忍言墓故改稱元堂耳志後言以貞元六年奉安宅兆至是蓋祔貞元六年在元和十五年前三十年乃謂葬其母王氏之年也志云淮夷削平之明年皇帝在宥天下方宏孝理詔百辟父母存有顯擢歿有褒贈時縝爲工部郎中由是拜公朝散大夫祕書省著作郎致仕以史攷之當是元和十二年十一月吳元濟伏誅之後也唐時恩例以子官而父存者雖已去官尙得遷轉超擢仍聽其致仕較後代僅得以子官封贈

者爲更優文簡質無華書法亦秀雅前人未見著錄  
當亦近年出土者長安志載洪固鄉在萬年縣南十

五里管邨四十八

古泉山館  
金石文編

案韋端元堂誌第四子紆撰書端五仕不出丞簿而  
題稱朝散大夫祕書省著作郎致仕者元和十三年  
淮西既平有詔推恩百官父母故端得拜顯揚之典  
端先世著於唐書宰相世系表郎公房與誌略同元  
和姓纂郎國公裕字孝寬周大司徒尙書令生津隋  
隴州刺史黃門侍郎吏部尙書唐諫議大夫太僕少  
卿壽光男津生琬職方員外成州刺史琬生季弼季

弼生廉考功員外廉生端端生縝紆與誌互異据誌

元和十四年己亥端壽八十有三則生於開元廿五

年丁丑卒之明年葬萬年縣洪固鄉畢原夫人王氏

之塋以子縝所撰夫人王氏墓志合之大厯十三年

戊午夫人年卅九則生於開元二十七年己卯祥案當是

廿八年庚辰十七于歸當天寶十四載乙未祥案當是十五載丙申

凡二十四年祥案當是二十三年而歿故曰輔佐君子踰廿年

也越十二年爲貞元六年庚午葬祔于姑又越三十

年而端與夫人同穴蓋端長於夫人二年祥案當是三年後

夫人四十二年而卒夫人志稱曾祖真行有唐汝州

葉縣令父毗京兆府奉天縣丞此志則稱夫人曾祖  
諱子真皇襄州錄事參軍考毗昭應縣尉惟祖怡官  
爵二誌皆同又夫人誌子五人曰縝曰潔曰系曰綰  
曰緝此誌子縝系練紆綯亦五人縝系見前誌餘名  
不同意端嘗有子八人迨元和庚子誌墓之時僅存  
其五或潔爲前卒而綰緝更名皆未審也此可補唐  
書宰相世系之闕林寶姓纂撰於元和七年則在此  
誌之前矣唐時子撰父碑者始於令狐德棻之撰令  
狐熙碑子書父碑者始於于立政之書于志甯碑其  
以墓志爲元堂誌則此爲初見元堂墓宅也閣帖唐

高宗書云使至知元堂已成既得早了深以爲慰陵  
初料高一百一十丈今聞高一百三十丈不知此事  
虛實是以陵寢爲元堂蓋唐時元堂之稱貴賤同之

金石  
續編

案穆員有元堂記曰刻石識墓非周孔之制宋齊  
以來有之所以藏馨香俟陵谷不可闕也此亦墓  
稱元堂之證元堂猶言元冢元壤也皇城南朱雀  
門街東五十四坊萬年縣所領新昌其一也新昌  
里卽新昌坊坊有楊於陵宅唐書楊損傳云楊損  
家新昌里損爲於陵之孫此里與坊通稱之證牛

僧孺張仲方溫造盧宏宣路巖宅均在其處唐書  
宰相世系表中山王氏有真葉令真之子怡戶部  
侍郎當卽夫人之曾祖祖也夫人志稱真行有唐  
汝州葉縣令與表合惟其名不同表載真之兄名  
子景以子景例之則此志稱子真者爲是意夫人  
志真行之行當屬下讀言行葉縣令耳此志稱襄  
州錄事參軍或後來遷轉之官而史家失攷或曾  
任斯職而終於葉令均未可知怡官與表不符疑  
表之誤表不載毗名亦屬闕漏中山王氏亦出晉  
陽故可稱太原焉又案隋書韋壽傳云父孝寬周

上柱國鄖國公瞿氏以表屬之隋謂失其實是矣  
傳又云津位至內史侍郎判民部尚書事與此志

亦合

南海神廟碑

元和十五年十月一日  
萃編載卷一百七

高六尺六寸廣三尺四寸五分  
廿五行行五十字字徑八分

陳諫書并篆額

缺并篆  
額三字

彌

作號  
下同 循作祝 彌祝作

扶胃之口

刊口誤富作明宮明作  
富富作明宮明作

同宮

其恭且嚴

其誤

牽牛牽作

奮掉

掉作

哥詠

哥作

即

祀于旁

祀作

海嶺

嶺誤

胡不

胡誤

故

元和十五年十月一日建

□字人李封齊

以上  
失載

碑文良不聽令以下字均明顯惟者由是皆流五  
字剝泐耳萃編以小字偏注殆拓本之劣邪抑拓  
本未全据集本錄之邪

鳳倉參軍司馬宗妻孫氏墓誌

方一尺一寸三分十九行  
行十九字字徑四分正書

唐朝議郎行鳳州司倉參軍上柱國司馬君夫人新安  
孫氏墓誌銘

并序

前翼王府參軍賈中立撰

夫人字堅靜建業人也 曾王父瑜睦司馬卽吳之洪  
胤矣祖從朗錄事父愿皇尉望江咸襲繁祉垂裕後昆



夫人婉婉令淋挺然生知及笄年適于司馬司倉宗  
竊窳閑雅謙和優柔行合規矩言堪典模恭理黍稷調  
暢琴瑟義光中饋孝顯家風綱衣無華舉案有則訓女  
四德示男六經親族娣姒肅然心伏凡在閨閭莫不書  
紳性止恬淡情忘嗜慾洞了生滅俄而謝世元和十五  
年五月十六日微疾岡瘵終于長安領政甲第也享年  
五十三以其年十一月廿二日將遷於國西阿城南原  
祀也嗚呼生事畢矣二女早逝有子長裕泣血哀號抑  
情就礼痛雍穆之風泯然斯絕刊石紀德庶幾不朽中  
立齋館之賓睹其家道不揆爲銘未充名實銘曰

婉婉積善 不享遐齡 貞操符祀 柔和合經

尺波一謝 寸晷夙停 愛其芳烈 刻石存銘

頌政坊在長安街西秦阿房宮在長安西北十四里阿城卽其故址順宗子緝封翼王

重立狄梁公祠碑

高九尺二寸廣四尺三寸廿七行行六十字字徑一寸四分正書篆額失拓在大名

大唐魏府狄梁

朝議郎行尙書虞部員外郎上柱國馮宿撰此在首行下

上關□州節度副使朝議大夫檢校太子左庶子兼御

史中丞賜紫金魚袋胡証書并篆額

后不可以獨臨必□□□□□□□□□□茲梁

國狄公是以興於天授之朝蘊沉謀□奇節也物不可

□□否必繼起邦傑欽往□□□功茲

沂國田公是以挺乎河朔之郊制新福□舊典也初

梁公出牧于魏實且斯人岡遂乞留則深遺愛闔境

□力生祠其神畏□□仁如在乎上祈恩徼福亦若有

蒼泊胡起幽陵毒痛中邦羗羗遺餘漸漬眊俗六十季

于茲矣戰血滿野忠魂歸天階阼□□隱嶙□在元和

壬辰歲

我天子恢拓千古之下庭凡在率土罔不來服維□□

□□保和一心之有衆舉茲列城表□多方□職貢而

奉官司□□□□□□禮鳳鳴□□音革蘭芬而棘刺

死醴湧而盜泉竭慶飛而□祲消四郊廓清萬戶丕變

然後辯正封疆咨謀耄老得是舊趾作□新□□□□

□□□□□□上下有度東西惟序披圖以立儀像據品

以昭命數不譖不偏經之營之越十月五日朕功成

沂國公於是乎謂護軍□□□將校□□□□□□

□□□□□□先一日親事設次于門西設柔毛翰音膾肥

鮮臺之具以俟詰朝公至則改服于次率護軍升拜將

校以下序拜□□□□□□□□□□而□□□□□□

皇風中微陰殄勃興六宮弄其神器萬

乘遜于房陵生人之耳目盡迴元老之肺肝殄固蹈

武尾奮正國

貞策授五王起包復夏之大業於心術貽安劉之

永圖於身後再造唐室時維梁公願不腆之

是羞獲守茲興三

天王天王重趨斯人而鑒厥誠未及浹辰而

璽書金印命服瑞節一日駢至且又頒非常之

清問下莫大之

跡空駕肩彼感心與喜固已羽九天而來今所

以靡遑甯屈思有上報竊慕神之志□景神之忠□薦

神□此□告神以□□至□□廢□□□□<sub>旌</sub>善乃守

臣之職烏敢爲名再拜而□□□□州之人士知

狄公之崇德可享而田公之<sub>斯</sub>言可復已詩云<sub>維</sub>

其有之□□□□□□□□曰

弈弈新祠于魏之彊巖巖<sub>梁</sub>□□此一方其惠伊

何其人則□在昔通天契丹猖狂衝陷<sub>連</sub>城勢莫與□

□□□□□□□□都會孰能保障

天后召公飛傳靡遑至自彭□□□金湯以逸待勞以

柔摧剛緩賦寬役勉農勸桑外示無□內爲之防□□

□□□□□□□□□□踴躍歡康□□公遷泣涕彷彿

惶援刀割厲守□王章終然莫克詎可弭忘眾

心城城經始斯堂立公儀形薦此馨□□□□□□□□

□□□□□□□□垂芳□惟

我公寔邦之良岐嶷有聞□□□□學以時習闇然日

彰文武是經謨謀允威測圭知正函鼎難量□□□□

□□□□使□□□□□□□□屈□□□威有鳥呈祥毗

于大理決獄平當□□□□鱗驟探武狼西門沉巫汲直

開倉蜀守興學晉臣撫□公兼有□□□□在□宣威中

□論道上庠慰□幽□□□暴強天授以還燉火無光

請請本枝□□□折下室人願上迴天網拜洛□圖非

劉而王□□□□□□□□□□□□

帝□

時惟狄公此巖廊進持正色中激剛腸婆侈

謀將易  
儲皇公陳不可校短推長血漚太階心

祈彼蒼長  
疑然

帝拜元老春歸少陽潛安爪牙密布棟梁七日寢□五

唐道優三仁功茂一匡始終無媿夷夏所

維此魏郊□□樂鄉燕寢之後□焉戰場何人不饌

塵室不喪祠宇煨燼階除墟荒故老懷思□  
 肫慨□<sub>猶</sub>

依封畛時奠壺觴否道既傾  
聖厯會昌元和御



辰

天子垂裳九夷八蠻山梯海航禮備樂陳執贄奉璋思  
我懷人寘彼周行是生 沂公忠順激昂劔久埋獄

雖能康囊□言悵悵武烈洸洸□尙管肅化臻龔黃掃  
除雰雰弔恤災傷尾斷蜂蠆苗鋤莠稂萬夫歸誠有死  
無將

天子嘉之需澤灇灇龍節虎旗玉珮金璫班其慶賜覃

及潛翔

沂公滋恭扶服兢惶

愧

負山

岳

誓酬毫芒

乃建

新廟

媿彼甘棠□其□□繚以周

牆

吉蠲庶羞容

衛兩廂仰止何遠中心是藏地迴沙

麓

河抱衡漳刻勒

豐碑揭乎中央

唐狄梁公祠堂碑馮宿撰胡證書元和中立

京畿金石考

右重立狄仁傑祠碑在大名碑首行闕泐僅見魏府狄梁四字蓋仁傑也仁傑字懷英并州太原人嘗爲魏州刺史卒贈文昌右相諡曰文惠中宗追贈司空睿宗又封梁國公故稱梁公也沂國田公者宏正也初名興憲宗賜名宏正字安道承嗣從子季安時爲衙內兵馬使同節度副使封沂國公梁公舊有生祠頽廢已久田宏正重立之因作是碑案史云仁傑爲魏州刺史民愛仰之爲立祠又

云子景暉官魏州司功參軍食暴爲虐民苦之因  
共毀其父生祠不復奉至元和中田宏正鎮魏博  
始奉葺之血食不絕此碑所記卽其事然碑敘祠  
廢不言魏民所毀攷金石錄目載有狄梁公生祠  
記李邕撰張廷珪八分書開元十年十一月立然  
則梁公生祠初毀於魏民之怨開元間重修之繼  
燬於安史之亂元和間復建之碑故有胡起幽陵  
毒痛中原及燕寇之後□爲戰場數語史傳所述  
特因景暉而連及之其於宏正再葺之前已有重  
修之舉不暇致詳耳碑敘事蹟與史傳脗合碑言

六宮弄其神器萬乘遜于房陵者謂武后及中宗也碑言璽書金印命服瑞節一日駢至者卽傳所謂賜紫袍龜帶后自製金字十二於袍以旌其忠也碑言在昔通天契丹猖狂云云者謂萬歲通天中契丹陷冀州河北震動前刺史驅民保城梁公悉縱就田虜聞引去民爲立祠也至自彭下所缺是澤字梁公由彭澤令擢魏州刺史也碑言屈□□感有鳥呈祥者謂居母喪白鵲馴擾也碑言毗于大理決獄平當者謂遷大理丞歲中斷久獄萬千人也碑言婪□侈謀將易儲皇公陳不可校知

推長者謂后欲以武三思爲太子衆莫敢對梁公  
諫止之吉頊李昭德數請還太子后意不回唯梁  
公每以母子天性爲言后始感悟卒復唐嗣也梁  
公言姑姪與母子孰親立廬陵王則常享宗廟三  
思立廟不祔姑故云校短推長也碑言尾斷蜂虻  
苗鋤莠稂萬夫歸誠有死無將者謂牙兵脅宏正  
還府殺士則及支黨十餘人圖魏博相衛貝渾之  
地籍其人以獻不敢署僚屬而待王官也碑言天  
子嘉之霈澤灑灑龍節虎旗玉珮金璫者謂憲宗  
美其誠詔檢校工部尙書充魏博節度也碑言班

其慶賜覃及潛翔沂公滋恭扶服兢惶者謂遣裴  
度宣慰賁及軍錢百五十萬緡六州民給復一年  
赦見囚存問高年惲獨廢疾不能自存者宏正奉  
上益謹請度徧行其部宣示天子恩詔因令節度  
崔懽奉表陳謝也撰書之馮宿胡証史皆有傳宿  
字拱之婺州東陽人常爲都官員外郎封長樂縣  
公官至東川節度使此碑結銜云尙書虞部員外  
郎則史未及之也証字啓中河中河東人田宏正  
以魏博內屬請使自副詔兼御史中丞爲宏正副  
使官至嶺南節度使此碑結銜州上似是華字關

勅不得其詳其檢校太子左庶子則史亦未及之也胡証所書之碑見於金石錄目者有烏承玘碑尙書省石幢記田宏正家廟碑得此而四矣京畿金石攷作胡證殊非碑無建立年月文內前云元和壬辰歲後云越十月五日厥功成建立當在其時城城蓋成城之譌康囊蓋處囊之譌武尾武狼則避虎改字也深作深俗

八瓊室石補正卷七十終

八瓊室金石補正卷七十一

男 繼輝校錄

太倉陸增祥撰

吳興劉承幹覆校

唐 四十三

忠武軍監軍使朱孝誠碑

長慶元年二月五日  
萃編載卷一百七

万代

万作萬

撫巡

撫巡誤

憫以

缺以字

追錫

缺錫字

公抱

缺公字

每

受

缺受字

機變

缺機字

碑稱密陳嘉謨請城天德云云元和郡縣志天德軍

本大安軍在大同川西乾元後改爲天德軍權居永

清柵又移在西受降城自後頻爲河水所侵元和八



年防禦使周懷義表請修築李吉甫以西城費用至  
廣功難施行請修天德舊城以安軍鎮孝誠陳請又  
在元和修築之前

平津讀碑記

靈巖寺功德龕題字二段

高二寸五分廣二尺前段八行字徑六分後段十一  
二行字徑四分餘行字均不一正書左行在長清

僧法英李禮□□王則長慶元年四月八日記之

長二年十二月八日魏龍寺僧神祐義新法從表偉同

來禮□

神祐者內黃人也姓劉氏

山左金石志少首三字拓未全也則誤作洲二年  
上當脫慶字尙有天禧五年王遂題記大安年高

祚伯元等題字余未之得唐以後刻世多不取拓者寡矣

盟吐蕃碑

高一丈一尺廣二尺五寸漢字六行行八十四字字徑寸許蕃字不計側厚一尺六分廿一列每列行字不等左行均行書在西藏伊克招廟大門右

大唐文武孝德皇帝

大蕃聖神贊普

舅

甥二主商議社稷如一結立大和盟約永無淪替神人俱以證知世世代代使其稱贊是以盟文節目題之於

碑也

下空

文武孝德皇帝與

約缺十字

□□□□舅

甥

溶括鴻被曉

今永之□亭矜愍之情

恩覆其無內外商議叶

同務令萬姓安泰所思如一成久遠大

治

再續燕之情

重申隣好之義爲此大和矣今蕃漢二國所

約泐十已四字

面盡是大蕃境土彼此不爲寇敵不舉兵革不相侵謀

封境

或有猜阻捉生問事□給以衣糧放歸

今社

稷叶同如一爲此大和然

舅甥相好之義善□

每湏通傳彼

泐二

□一

約泐九字

蕃漢並於將軍谷交馬其

綏戎柵已東大唐祗應清水縣已西大蕃供應湏合

舅甥親近之禮使其兩界煙塵不揚同□殺盜之

名復無驚恐之患封人撤脩鄉土俱安如斯樂業之□

約泐十  
二字 於日月所照矣蕃於蕃國受安漢亦漢國受樂

茲乃合其大業耳依此盟誓永久不得移易然三寶及

諸賢聖日月星辰請為到盟如此盟約各自契陳刑牲

為盟謂此大約儻不依此誓蕃漢約泐十字禍也仍須讎口

及為陰謀者不在破盟之限 蕃漢君臣並稽告

立誓周細為文 二君之驗搭比有印登口口口

口口姓名手執如斯誓文藏於王府焉

碑側

大唐口口等和好登壇口口口 大唐宰相口口泐

正議大夫口口泐 朝散大夫中書侍郎同泐 太中

大夫中書侍郎同平章事王播一中大夫尙書戶部

侍郎同平章事杜元穎正議大夫兵部尙書蕭儼

大唐諸寮案登壇者名位金紫光祿大夫尙書右僕

射韓臯朝議郎御史中丞牛僧儒太中大夫尙

書右僕射兼吏部尙書李絳銀青光祿大夫戶部尙

書楊勣通議大夫禮部尙書韋綬

大夫尙書右僕射兼太常卿趙宗儒太中大夫禮

部尙書兼司農卿裴武正議大夫京兆尹兼御史大

夫柳公綽銀青光祿大夫工部尙書兼右金吾衛大

將軍郭從

□□大夫大理卿兼御史大夫劉元鼎

朝議大□□司□□兼□史中丞劉師老□□□□

行<sub>泐二</sub>□監察御史□□□□□□□朝議郎□<sub>泐二</sub>行

學□□□<sub>泐</sub>

碑在衛之伊克招廟大門右上刻長慶初唐與吐蕃

會盟之文至今碑尙完好其文曰<sub>云</sub>按舊唐書長

慶元年九月吐蕃遣使請盟許之乃命大理卿兼御

史大夫劉元鼎充西蕃會盟使兵部郎中兼御史中

丞劉師老爲副元鼎等與論訥羅同赴吐蕃本國就

盟此碑卽當時所置也<sub>大清一統志</sub>

右吐蕃會盟碑在喇薩刻於石柱上舊唐書吐蕃傳

長慶元年九月吐蕃遣使請盟乃命大理卿兼御史大夫劉元鼎充西蕃盟會使十月十日與吐蕃使盟宰臣及右僕射六曹中執法太常卿司農卿京兆尹金吾大將軍皆預焉仍勅元鼎到彼令宰相已下各於盟文後自書名二年二月遣使來請定界六月劉元鼎自吐蕃使迴奏云去四月二十四日到吐蕃牙帳以五月六日會盟訖此卽五月六日所盟文也文後本有諸臣題名此拓本失之 大清一統志載有

此碑釋文與此多不同

平津讀碑記

按是碑 大清一統志西藏志皆載之作伊克招唐

碑其文與石本有異附錄之以備參攷并據全唐文所錄全文而今石文摩泐者以小字旁注之蓋石本間有磨泐不全志則節錄損益以足成之非別有一碑也道光元年玉研農尙書駐藏回都攜有墨拓知余有金石癖以一本見詒是碑遠在西陲頗爲艱致因卽錄其文著於編攷文刻石柱右半漢書左半蕃書左右兩側爲漢蕃諸臣題名亦漢書蕃書相間也舊唐書吐蕃傳自貞觀八年通使中國其後屢寇屢和開元二十二年遣將軍李佺於赤嶺與吐蕃分界立碑今其碑之存佚未知也長慶元年命大理卿兼



御史大夫劉元鼎與吐蕃盟會使

云

此卽長慶元

年五月劉元鼎與吐蕃盟之文舊西域志及西藏志  
衛藏圖識屬之德宗誤矣左右兩側名雖剝蝕其可  
見者與新唐書所載多合惟兵部尙書蕭俛碑作工  
部尙書禮部尙書裴武碑作農卿當以碑本爲正又  
案新唐書長慶元年吐蕃盟策署彝泰末今此碑末  
漢蕃皆未署年月當非盟策盟策未知勒石否也

筠清

館全  
石記

訪碑錄及吳氏皆以此碑爲立於長慶元年五月  
案穆宗上尊號曰文武孝德皇帝在長慶元年七

月新唐書吐蕃傳云方盟時吐蕃以壯騎屯魯州  
靈州節度使李進誠與戰大石山破之大石山之  
戰本紀系於元年十月其非五月所立不待言矣  
此所謂方盟時者乃京師西郊之盟非此碑就盟  
其國之時也新唐書於大石山戰之下云明年請  
定疆候元鼎與論訥羅就盟其國舊唐書明言二  
年二月遣使來請定界以五月六日會盟訖是京  
師之盟在元年十月吐蕃之盟在二年五月孫吳  
兩家誤合爲一耳新唐書又云元鼎還虜元帥尙  
塢藏館客大夏川集東方節度諸將百餘置盟策

臺上徧曉之且戒各保境毋相暴犯策署彝泰七年吐蕃彝泰七年當唐之長慶元年此盟於京師之盟策非盟於吐蕃之盟約也碑前云結立大和盟約後云如此盟約則非卽盟策可知亦不得併爲一焉碑多剝侈 大清一統志載有此文具錄於後第二行與字之下志作聖神贊普二聖六字其下直接濬哲無舅甥二字第三行所字之下志作守見管封疆洮岷之東屬大唐國其塞十五字第四行彼字之下志作此相倚二國常相往來兩路所遣唐差十五字第五行安下志作並無相擾

之犯垂恩萬代則稱美之聲遍十六字無如斯樂業之五字第六行不依此下志作言背約破盟者受其殃九字無誓蕃漢三字其志與碑異者一並錄之證知知作之盟文節目題之於碑也作勒石留傳之於後也今永之□作久永之化亨作垂其無內外之其作並再續燕親之情重申作之績茲者同心以申爲此大和矣作共成厥美蕃漢作漢蕃已西作之西境土作地土寢敵作殺敵猜阻作積阻給上似譌字志無之今作令叶同如一爲此大和作山川無擾各敬人神善□作苦難蕃漢作

蕃使綏戎柵已東作洮岷之東祗應作供應已西  
作以西湏合作湏令同□竊盜作同聞頌德復作  
永慮作患封人作行人茲乃合其大業耳志無此  
句依上多一各字永久不得移易作永不移易然  
作當賢下無聖字仍湏讎□及爲陰謀者不在破  
盟之限志無此語稽告立誓作稽首告立二君之  
之下作德萬載稱揚內外蒙庥人民咸頌矣與碑  
迥異曩見筠清館金石記載此碑有跋無文跋語  
謂據全唐文所錄以小字旁注之余無是書不能  
輒補焉碑側列諸臣名位新唐書云以大理卿劉

元鼎爲會盟使右司郎中劉師老副之詔宰相與  
尙書右僕射韓皐御史中丞牛僧儒吏部尙書李  
絳兵部尙書蕭俛戶部尙書楊於陵禮部尙書韋  
綬太常卿趙宗儒司農卿裴武京兆尹柳公綽右  
金吾將軍郭縱及吐蕃使者論訥羅盟京師西郊  
贊普以盟言約二國無相寇讐有禽生問事給服  
糧歸之詔可大臣豫盟者悉載名於策又云其國  
收虜大臣亦列名於策碑書上蕃下漢其蕃字爲  
虜臣或卽唐臣不得而知碑書宰相名位王播之  
上尙有二人其名旣泐以宰相表攷之當是段文

昌崔植也蕭俛已於元年正月罷相碑仍列於宰相者當以其曾爲宰相之故特次於宰相之末而不書同平章事以區別之韓臯以下諸臣皆與史合惟史不詳階秩及兼官耳戶部尙書楊之下蓋勑於陵二字劉師老署銜所缺蓋右郎中三字蕭俛裴武署銜亦與史合吳氏以爲不符者於兵字則審之未細於裴武署銜則讀之未全也碑於劉師老以下尙有二列史所不載據吳氏謂碑有左右兩側余僅得一爲左爲右不可臆定新唐書所載均已見於此側其一側所書不知幾人或係虜

臣邪宰相以下十四人當是元年十月在京師豫  
盟之大臣劉元鼎以下方爲就盟吐蕃之臣備書  
之者重此盟也史第載京師豫盟之臣而於就盟  
諸臣不及詳敘無從知之矣又案新書唐云唐使  
者始至給事中論悉答熟來議盟大享於牙右飯  
舉酒行與華制略等樂奏秦王破陣曲又奏涼州  
胡渭錄要雜曲百伎皆中國人盟壇廣十步高二  
尺使者與虜大臣十餘對位酋長百餘坐壇下上  
設巨榻鉢盂通升告盟一人自旁譯授於下已歃  
血鉢通盂不歃盟畢以浮屠重爲誓引鬱金水以



飲與使者交慶乃降此當時盟制也虜俗小盟用  
羊犬猴爲牲大盟用人馬牛驢爲牲凡牲必折足  
裂腸陳於前使巫告神曰渝盟者有如牲碑故有  
刑牲爲誓之語碑有或有猜阻云云與史所言禽  
生問事給服糧歸者同

梁守謙功德銘

長慶二年十二月一日  
萃編載卷一百七

平相

手卽厥  
誤作牙

貝菜

菜作葉  
下同

遲

遲作畫掩

畫作

疋馬

疋作匹

啓

開

開作闕

公曰

缺公

烹

誤刊

牖

牖作天

睽

睽上多

格

羅

脩作

禮

佞

作

鬱

鬱作

口

缺

調

伏

光

天

缺光

葺

缺

心

猿

舒

舒誤

斲

斲作

莊嚴

裴夜浮素缺浮字

碑爲楊承和撰書陸邳題額時守謙爲右街功德使承和爲右街功德副使皆以內侍充此官副使之名不見於新唐書百官志元和姓纂邳陸綜子平津黃碑記

碑用材武武豹皆虎之避用字

范氏女阿九墓誌

方一尺二寸四分十七行行十五字字徑五分正書

大唐故范氏女墓誌銘并序

兄鄉貢進士鄴述在首行下

皇光祿卿贈左散騎常侍順陽□次女字阿九年十六

以長慶二年十二月十九日疾終于京兆長興里

太夫人河東縣君裴氏傷悼貞淋哀疚于懷噫夫婉順情性內理剋明肅閨壺之儀曉組紆之跡至美不顯胡其鑒耶

姻懿知者垂泣來吊

母兄之悲其可勝哉明年四月十三日窆於國之東隅

白鹿原之別業鄴奉高堂之命忍哀誌焉銘曰

斷手裂心兮其痛何禁歆余之悲兮殆之深呼不來

兮思往莫得入九泉兮音姿悄默天不善善兮奈何心

悽怛兮無極淚濕栢根兮聲咽曠野一支長瘞兮孤墳

之下

右范氏女阿九墓誌首云皇光祿卿贈左散騎常侍順陽□按唐書范傳正傳字西老鄧州順陽人官至光祿卿以風痺卒贈左散騎常侍是誌所稱者卽傳正也順陽下所缺當是范字或是之字史傳不及後嗣讀此誌知其子名鄴矣

顏永墓誌

方一尺二分十七行行十七字字徑四分正書在江都

唐故顏府君墓誌銘

并序

鄉貢明經李德芳述

府君諱永其先□□人也 祖考並繼世承訓餘風所

播□傳素業□□□□六合大和隱而不仕 府君中

和立身□□全節溫柔成性積祿崇高孝□□□言謙

有□嗚呼不幸遭疾卽以長慶四年歲次甲辰二月辛

巳朔七日丁亥終於揚州江陽縣布政里之私第春秋

六十有八 夫人□南黃氏令則高門容華備質笄年

之歲□于顏□之門事君子盡忠□親□慈以孝□男

二人長曰巨次少洪皆□□□□達義方 卽以 其月廿

九日巳酉安厝于蕪城之東 鄉五乍村之原謝氏

之地禮也□□代綿遠□□□移故刻貞石紀德乃爲

銘曰

江漢炳靈 繼生賢明 猗歟顏君 蔚然時莫 落

日空奄 逝水峩傾 卜葬平野 風樛栢聲

庚辰秋汪硯山寄詒云誌不甚泐字爲土鏽填塞  
獲石者不敢妄動也惜不得臨石一審之俄作我  
是年三月庚戌朔此稱辛巳朔是二月爲小盡矣  
長沙高士墓誌

高一尺二寸八分廣一尺二寸五分首尾平曼存  
十九行行廿二字字徑四分正書在長沙府學

首行  
全泐

唐□□元年正月廿九日長沙高士□□□□通□□

□□□□□□□□悴乏于甘泉鄉甘泉里之私第享壽□

□□□□□□□□高士□□也是得錄于姓族素行以□終

□□□□□□□□也夫其先安宅臨涇人也晉右僕

射□□□□□□□□□□□□子孫播遷至十八代孫

皇朝爲長□□□□□□自後子孫遂居長沙便爲郡人

也果殺生□□□□□□□□□□生試懷州武德承諱

珎高士則武德□□□□□□生而好學□始弱冠鼓篋郡庠

精春秋左氏傳累□□□□□□雲用光王進而高士性將

道合德行天与孜□□□□□□之儔也依乎膝下之愛不

忍離其色養親歿之後□□□□□□乃曰代与我違夫何求

哉遂油々然耕業於田間□□□永歌堯舜而已身  
外之事付乎四男長諱次□□□高士德教有令問  
焉貴室朱氏自佐高士五十年□□合和若鸞鳳翡翠  
之婉變矣栢舟之志既高女蘿之□□有二女皆歸令  
德盧氏王氏矣嗣子諱荇泣血柴骸□□□以明年春  
仲月廿六日協吉遂奉裳帷遷神于翼□□□山原  
附 先夫人塋從其禮也天高地遠□□□□□□  
□以爲紀乃銘曰

上風霜缺

右長沙高士墓誌癸酉六月出長沙城東南數里



未詳其地曼患彫剝首尾不具文中要處均已磨滅以十數拓本竭兩日之目力反復諦審而勘之辨識二百八十九字雖紀年姓氏尙不得見差可攷證矣文云其先安定臨涇人也其下見晉右僕射四字攷元和姓纂胡梁皇甫牛鄧席六姓郡望皆出安定梁出安定烏氏皇甫出安定朝那非臨涇也鄧攸爲晉右僕射乃平陽鄧氏非安定鄧氏也安定鄧氏有名羗者爲苻秦左僕射非仕於晉姓纂亦不言臨涇牛允仕後周工部尙書封臨涇公唐書宰相世系表作臨淮公或係表誤要爲封

邑而非里貫且在晉後亦未爲僕射然則出自安定臨涇者惟席與胡耳席氏無官僕射者晉胡奮官至左僕射諡曰壯碑文右僕射下約略有一壯字然則誌所稱晉右僕射者當卽胡奮奮安定臨涇人正相脗合惟史稱左僕射誌言右僕射小有不符然官職左右之分碑與史異者不可勝數高士蓋姓胡胡奮之後裔可無疑矣又案太宗名世民文云代與我違避世用代則誌作於太宗以後可知敬宗名湛凡从甚之字皆避偏旁缺筆作甚鄭茂謚改名茂休高士嗣子以謚爲名則在敬宗

以前又可知貞觀十年改別將爲果毅都尉文有  
果毅生字下又有生試懷州武德丞下又有高士  
則武德數字蓋言武德之子也武德爲高士之父  
果毅爲高士之曾祖其官果毅時在貞觀十年以  
後其上云至十八代孫皇朝爲長長下缺五字當  
是沙果毅都尉或沙府左果毅右果毅也文又云  
貴室朱氏自佐高士五十年是高士之卒總在七  
十左右高士爲果毅之曾孫以三十年一世約計  
之自貞觀間至高士之卒約在百年以外首行元  
年上依稀似是寶字疑是天寶元年未敢遽定附

長慶末葬地殘缺山原上頗似青字湖南通志云  
青山在縣東北八十里今誌石出東南數里許與  
志不符

隱山李渤等題名

高三尺七寸廣八尺四寸廿一行行  
字不一字徑二寸許正書在臨桂

寶林元年給事

隴西公以直出廉察于此□和年旣豐乃以泉石爲娛  
搜□訪異獨得茲山山有四洞斯爲最水石清拔幽然  
有真趣可以遊目可以永日愚以爲天作以遺公  
也不然何前人之盡遺耶明日與諸生遊因紀名氏

武陵奉 命操筆倚石叙題之

桂州刺史兼御史中丞李渤

嗣郢王佑

遺名居士韋方外

都防禦判官侍御史內供奉吳武陵

觀察判官試大理評事韋碯

鹽鐵判官前廬州慎縣主簿路廣

館驛判官前潭州湘鄉縣主簿□缺

都防禦衙推韓方明

前觀察衙推段從周

處士蕭同規

鄉貢進士吳汝爲盧溫夫吳稼

文僧西來匡雅大德曇雅

六月十七日書

右隱山李渤等題名在臨桂新唐書本傳李渤字  
濬之敬宗初由給事中以論崔發暴中人事出爲  
桂管觀察使題名云以直出廉察者此也題名有  
嗣郢王佑者攷十一宗諸子傳元宗子太子瑛始  
王眞定進王郢開元三年立爲皇太子廿五年廢  
爲庶人寶應元年詔贈皇太子瑛子五人儼封新

平郡王伸平原郡王侁嗣慶王備太僕卿侁失傳  
宗室世系表載瑛七子儼伸侁備與傳相同惟備  
封韓國公傳所未載侁作儋五子之外有鄭國公  
儆太僕卿倫皆無名佑者亦無嗣郢王者据此知  
傳表皆有闕漏可以補之太子瑛外別無封郢王  
者矣本紀寶應元年復瑛封號與傳稱追贈皇太  
子者互異傳之失也題名又有都防禦判官侍御  
史內供奉吳武陵者新唐書本傳吳武陵信州人  
元和初第進士長慶初竇易直判支表武陵主鹽  
北邊久之入爲太常博士後出爲韶州刺史貶潘

州司戶參軍卒不言其爲都防禦判官亦不言其爲侍御史內供奉傳之漏也傳又云柳宗元謫永州武陵亦坐事流永及爲柳州刺史武陵北還大爲裴度器遇宗元刺柳州在元和中年其時武陵北還尙未爲太常博士武陵之至桂州其在出刺韶州之後耶宏簡錄武陵傳長慶初曾擢戶部員外郎刺韶之前嘗刺忠州亦無仕桂及侍御史內供奉之官又案蒼梧有吳武陵墓刻咸通二年七月立見粵西金石待訪錄疑傳稱卒於潘州司戶者亦未確實題名又有觀察判官試大理評事韋



礪者攷宰相世系表鄖公房礪官司封郎中太原  
河東行軍司馬或卽其人也同治癸酉海琴游桂  
林搜得拓寄云志乘所未載者亟錄之案粵西金  
石待訪錄有李渤隱山六洞詩賦序碑當在此題  
名之年又有韓方明所書新開隱山六洞記在此  
題名後兩月韓方明卽此稱都防禦衙推者此題  
云山有四洞彼云六洞者續得而開之也惜不得  
一一搜拓之

南溪題刻二段

高七尺二寸廣六尺三寸廿六行行卅五  
字字徑二寸許分書在臨桂南溪山元巖

南溪詩序

成紀縣子李渤

桂水過灘山右匯陽江又里餘得南溪口溪左屏列崖  
巘閼麗爭高其孕翠曳煙邐迤如畫右連幽墅圍田雞  
犬疑非人間泝流數百步至元巖巖下有沔壤沮洳因  
導爲新泉山有二洞九室西南曰白龍洞橫透巽維蛻  
骨如玉西北曰元巖洞曲通坎塢晴眺灘水元巖之上  
曰丹室白龍之右曰夕室巽維北梯嶮至仙窟仙窟北  
又有六室參差呀豁延景宿雲其洞室並乳溜凝化詭  
勢奇狀仰而察之如傘如輦如欒榱支撐如蓮蓴藻井

左睨右瞰以簾似幃似松偃竹裹似海蕩雲驚其玉池  
元井嵐窓魔戶迴還交錯迷不可紀從夕室梁溪嚮郭  
四里而近去松衢二百步而遙余獲之自賀若獲荆璆  
與螭珠焉亦疑夫大舜遊此而忘歸矣遂命發潛敞深  
陞危宅勝旣翼之以亭榭又韻之以松竹似譙方丈如  
昇瑤臺麗如也暢如也以溪在郡南因目爲南溪兼賦  
詩十韻以志之寶厯二年三月七日敘

詩

元巖麗南溪新泉發幽色巖泉孕靈秀雲煙粉崖壁斜  
峯信天插竒洞因神闢窈窕去未窮還迴勢難極玉池

似無水元井昏不測仙戶掩復開乳膏凝更滴丹爐有  
遺趾石逕無留跡南眺蒼梧雲北望洞庭客簫條風煙  
外爽朗形神寂若值浮邱翁從此謝塵役

南溪元巖銘

并序

青溪子李涉

桂爲郡也巖其先之有井室人巳百千祀矣居是邦者  
匪哲則豪何四三里之內而巖不載於前籍爲巖將屈  
於古而合伸於今哉爲人未知其巖巖俟人以時扶青  
溪子昧而未詳也予之仲曰渤受天雅性生不雜翫少  
常讀高士傳列仙經遊衡霍幽遐之境巢嵩廬水石之

與凡落所觀必皆礪磨大璞剪鑿遺病意適而制非主  
於名寶厯初自給事中出藩丐桂一之季治鄉野之病  
二之載搜郭郭之遺得隱山元巖冥契素尙余因謫去  
炎海途由桂林元巖之脉再遂其賞勒銘洞石表遠跡  
於他季銘曰

桂之有山潛靈億季拔地騰霄戟列刀攢巖之有洞竅  
龜尊盤虎挂龍懸形狀萬端旁馳查其仰沓嶺岼玉落  
聳匪幽聲晝寒巴陵地道小有洞天文籍之聞吾何有  
焉酒一卮芳琴一曲嵒岨之下可以窮季

李渤字潛之嘗爲桂州刺史充桂管都防禦觀察使

新舊唐書皆有傳唐詩紀事李涉渤之兄纖人也早  
從陳許辟憲宗時爲太子通事舍人投匭言吐突承  
璀冤狀孔戣表其奸逐爲峽州司倉參軍大和中爲  
太學博士復流康州自號青溪子廣西金石略云涉  
有奉和九弟渤見寄絕句知渤行次第九序云予之  
仲曰渤仲爲弟之通稱不定居次劉玉麈謂渤爲仲  
弟新書不得稱涉爲仲兄非也又敬宗紀寶厯元年  
正月七日改元大赦壬申以給事中李渤爲桂州刺  
史舊史稱渤寶厯中轉給事中誠誤至涉來桂當在  
大和間謫康州時涉有譴謫康州先寄弟渤詩言其

將至桂也此序亦云謫去炎海途由桂林康州今肇  
慶府故曰炎海且必取道桂林王鏐謂是謫武陵時  
事亦非其以夷陵爲武陵又踵唐詩遺響之誤

金石續編

明統志陽江在府城南源出靈川縣思磨山東流  
入於灘江碑云右匯陽江者卽此南溪山在府城  
南七里聳拔千尺煙翠凌空下臨南溪碑所謂南  
溪者卽此南溪爲渤所命名後又因溪以名山未  
名南溪之先厥山何名碑不言之統志又云白龍  
洞在府城南七里俯瞰南溪唐李渤嘗名以元岩  
宋改曰白龍洞以洞中乳石凝結如白龍狀碑云

西南曰白龍洞西北曰元巖則謂白龍洞卽元巖  
改名者未確宋避始祖諱概稱爲白龍洞不復分  
晰理當有之其以元巖爲渤所命名恐亦未實廣  
西通志云白龍洞在南溪山下五代末南漢謀并  
靜江地湖南遣兵屯龍洞以拒之卽此西北曰元  
巖唐李渤命爲蔭巖後避宋太祖諱易今名渤多  
所建築今惟詩銘序文石刻存焉元巖之命爲蔭  
巖今無可攷避宋太祖諱者音近之字也宋世賣  
香印者卽鳴鑼而不呼以音近太祖諱故蔭字之  
避蓋亦同之特復舊名非易今名也所謂詩銘序



文者蓋卽此刻惟銘出李涉之手概以爲渤作未  
分曉耳渤自署成紀縣子似是封爵兩唐書皆不  
載其留別詩只署成紀二字則其里貫也新書云  
與仲兄涉偕隱廬山更徙少室舊書云隱於嵩山  
碑所云巢嵩廬水石之奧也全唐詩傳稱李涉洛  
陽人初與弟渤同隱廬山後應陳許辟憲宗時試  
太子通事舍人謫峽州司倉參軍大和中爲太學  
博士復流康州自號青谿子與渤自署成紀者不  
同然舊書亦有罷歸洛陽之語殆其隱居之地而  
遂爲洛陽人耶敘云山有二洞九室曰丹室曰夕

室曰仙窟其六室不詳何名續編誤六爲石曩未  
校正今始改刻仍述之以志吾過支撐作支撐古  
字作檠檠櫟通用說文檠衰柱也徐鉉曰今俗別  
作撐非是車定釋名作車棠說文金部作車檠此  
櫟字之所由製棠堂古通故檠又變作櫟也巨治  
二字避諱缺末筆

皇澤寺造象三段

在廣元西一里

轉運使崔殘題字

二行可見者十三字  
字徑一寸四分正書

轉運使崔

□□□□□□□□□□□□□□□□

下缺

戊上元後

□□□□□□□□□□□□□□□□

下缺

修佛閣記 七行行世字字  
經八分許正書

再修西龕佛閣記

益昌郡城江岸之□□□□十里有 鑿石 古龕、有釋

迦如 來像設并諸聖賢 為侍衛之儀□□□□□□□□

則□□□聖唐貞觀二載郡□ 武都督楊夫 □靈異 加

響建其□□□□□□□居諸而□□□兆聖儀容□

為風雨所侵 我太守北平公崔於□□□□□□□□

□□□□□拾淨 籍 □□□□□□□滕曰遽命良工

□□□□□□□水□□□□□□□一方□□□□□榮

大唐寶曆二年 歲次 □□□□□□□□□□

右碑高三尺八寸廣一尺三寸額鑄佛龕環以蟠  
龍額下前兩行有轉運使崔字不見其名□戌上  
元亦無由攷爲何年後七行左行標題云再修西  
龕佛閣記中有貞觀二載字當是述刼建佛閣之  
事又云我太守北平公崔未審卽轉運使其人否  
益昌郡本義成郡天寶元年更名補訪碑錄作皇  
澤寺轉運使崔□造象殘碑上方有橫列十字非  
古刻也碑文闕字據三巴耆古志補注之

造釋迦象殘碑

高三尺廣一尺三寸十三行行  
廿三字字經六分正書直界格

□

□

□

□

□

□

□

□

□

□

□

□

□

□

□

□

□

□

□

□

□

以

世大音無聲

□□□□□□□□□□□□□□□□□□□□□□  
妙□□□□□□□□□□□□□□□□□□□□□  
以大悲□□□□□□□□□□□□□□□□□□

□□□□□□□□□□□□□□□□□□□□□□  
精勤者必□□□□□□□□□□□□□□□□□□  
乘法□□□□□□□□□□□□□□□□□□□□

□□□□□□□□□□□□□□□□□□□□□□  
後父猛□□□□□□□□□□□□□□□□□□  
奔誠信□□□□□□□□□□□□□□□□□□

□□□□□□□□□□□□□□□□□□□□□□  
母雍氏□□□□□□□□□□□□□□□□□□  
功□□□□□□□□□□□□□□□□□□□□

□□□□□□□□□□□□□□□□□□□□□□  
語其□□□□□□□□□□□□□□□□□□□□  
宗□□□□□□□□□□□□□□□□□□□□

□□□□□□□□□□□□□□□□□□□□□□  
所□□□□□□□□□□□□□□□□□□□□□  
中□□□□□□□□□□□□□□□□□□□□

□□□□□□□□□□□□□□□□□□□□□□  
山□□□□□□□□□□□□□□□□□□□□□  
淨資造斯釋□□□□□□□□□□□□□□

□□□□□□□□□□□□□□□□□□□□□□  
建□□□□□□□□□□□□□□□□□□□□□  
四生必□□□□□□□□□□□□□□□□□□

□□□□□□□□□□□□□□□□□□□□□□  
衰虛心□□□□□□□□□□□□□□□□□□  
精

物表□□□□□□□□□□□□□□□□□□□□  
垣□□□□□□□□□□□□□□□□□□□□□  
精

慙長行□夜□□□□含□光□□□□□□□□□□

迷源遣斯□□□□□□□□□□□□□□□□□□

虛妄□能即歸恭□□□□□□□□□□□□□□□□

合体明□

右碑額中鐫象龕以蟠龍環繞之形制與前碑同

彫剝已極僅辨世餘字據三巴舊古志補注闕文

亦共只七十七字不見年月姓名中有造斯釋□

語蓋造釋迦象也即以名之補訪碑錄作皇澤寺

造象殘碑

柏堂寺菩提瑞象頌

高六尺六寸許廣存二尺三分廿二行行上存廿九  
字下存五字字徑七分正書篆額失拓在四川廣元  
皇澤寺

大唐利州刺史畢公柏堂寺菩提瑞象頌 并序

姪前鄉貢進士彥

中為四十二娘造象磨去約缺三十五六字

男穎

此在標題

下

嘗聞瑤界有無生大僊善權多方藏用滅息首出眾聖

量涵虛空示色法而

中

□有化偃三空而不無窮微極

思人徑罕及應求而往莫或階焉自白月敷暉雙林稅

駕優

中

□以昭異或因機以變石或留影以制龍金蟻

神其源白兔祥其末與夫異門同入於樂地

中

化由乎

覺忍誠信資乎勝根理實然也利州柏堂寺往居列城

州牧攸宅

天后聖帝

中缺

□茲宇晉壽遺黎葭萌古

壤錦嶂緣其後凌江達其衝軒檻豐麗場域閑敞危途

緬衍馳驚

中缺

□因寺以興号

假樹以立名初者天竺不

生思觀象法能殫衆巧所擬罕成上果通士感念

中缺

泥

不滿備珎飾而相好周圍靈幃真顏今卽遺制粵若季

父銀青光祿大夫使持節利州

中缺

源受魏之梁之大業

克濟厥美不隕其名管樞極而三事代傳牧本州而五

葉相襲英氣聯

中缺

郡太守度支尙書兗州刺史府君台

庭坐謀遺愛貴州布政優優百祿是道公之

曾祖



中缺  
□大父

皇朝尙舍奉衙蜀弼二王府長史台

鄂滁三州刺史府君六尙欽若王藩列中缺  
器司戎半刺

邦政馴致威騰景標舉葳蕤昭赫恭列務以夷亂牧外

臺而保甯徽問溢乎中缺  
潔白安可而緇磷沖用以博暢

經才以優洽強學垂裕虛容保和孝睦叶於靈心能事

探中缺  
倉叅軍次拜滁州錄事叅軍次除博州錄事叅軍

遷鄭州司兵叅軍初掌軍儲再司樞紐中缺  
衝要曳墨綬

而効績克揚奉遊冠而清閣自□□□□問美□時談

制授秦州都督中缺  
奏課連最受金帛以延渥

異品□□以□□□□□功俾我今職至夫導禮以

訓中肯至於臧否順□何□□□儀慧□□□□□

□於□□□□□之未□瞻前徽而中歔歔以遐

矚□□□□□□□□□□□□□□□□□□□

□□□問□□□□□中聲衆肅恭□上全泐廿九纖

埃能□上泐廿九熱於嘉木地上全榮陽鄭崇嗣上全

□□入仕□後缺

碑爲四十二娘造象磨去三十五六字行間尙有

字蹟不可辨識畢公及其曾祖大父之名均不得

見撰人名僅見一彥字前云姪前鄉貢進士彥缺

中云粵若季父故知爲撰人也碑後未全不知所

缺幾何碑有額題菩提象頌四字此本失拓以篆

額居中計之

据香古志碑圖而言

首尾共廿三行今所見者

廿二行也三巴香古志止廿一行所得本然耳碑

尙有側列參軍令丞簿尉姓氏二列列十七行未

見拓本往歲得此本分爲二紙下截磨蝕之字無

從命名乙亥春購得三巴香古志讀之始審爲一

碑分二碑圖之所以可貴也案元和姓纂太原畢

氏狀稱畢諶之後唐滁州刺史畢誠生操操生正

表正則正義正表生重華絳州刺史生彥雄正義

大理正竊疑碑所稱台鄂滁三州刺史府君者卽

誠也畢公之大父也畢公卽重華其刺繇州在利  
州後也畢公之姪彥□與重華之子彥雄均以彥  
字爲排次亦無不合碑無年月案唐武宗名暎改  
名炎避偏旁改談作譚文云美□時談不避談字  
文宗初名涵書函作函鄭涵改名澣文云量涵虛  
空不避涵字然則此碑之刻在文宗以前無疑明  
皇名隆基兼避箕姬幾機等字文云或因機以變  
石不避機字敬宗寶厯元年正月帝主祧遷自高  
宗至明皇四宗不諱是此碑之刻不在明皇之前  
卽在敬宗之世也附寶厯末

八瓊室金石補正卷七十一